

風易飄蕩自令青鳥只銜之詩中報郎
 含隱語郎知暗到花深處三五月明當
 戶時與郎相見花間路

蒲東崔張珠玉詩集卷下終

西廂會真記

唐 元稹撰

唐貞元中有張生者性溫茂美風容內秉堅孤非禮
 不可入或朋從遊宴擾雜其間他人皆洵洵拳拳若
 將不及張生容順而已終不能亂以是年二十三未
 嘗近女色知者詰之謝而言曰登徒子非好色者是
 有淫行余真好色者而適不我值何以言之大凡物
 之尤者未嘗不留連于心是知其非忘情者也詰者
 識之無幾何張生遊于蒲蒲之東十餘里有僧舍曰
 普救寺張生寓焉適有崔氏孀婦將歸長安路出于